



Gratulaziuns per il sportist grischun da l'onn Andri Ragetli (a dretga) er da cusseglier naziunal Martin Candinas.

# Per blers ina gronda surpraisa

Cuira: Notg da sport grischuna

DA GION NUTEGN STGIER / ANR

■ Il titel dal sportist grischun da l'onn 2016 è bain i a Flem, però na a Binia Feltscher, la dubla campionesa mundiala da curling, mabain al freeskiunz Andri Ragetli. Il giuven atlet da 17 onns ha retschet online las pli bleras vuschs ed uschia triumfà, er sche la prestaziun sportiva da Binia Feltscher è considerablama in da pli gronda valur. Il titel sportist grischun è vegni surdà l'emprima giada il 1992 e quai a la patinunza Barbara Hunger. Dapi 17 onns undrescha dentant la Federaziun grischuna per sport sportists e sportistas ed a medem temp vegn er elegi il sportist ubain la sportista da l'onn. La notg da sport, quella n'è betg uschè viglia ed è vegnida introduida avant quatter onns. Quella occurrenza è lura la saira da las sairas nua che la prominenz grischuna dal sport e da la politica s'inscuntra. Venderdi ha gi lieu en l'Auditorium da la Banca chantunala la 5avla ediziun da la Notg da sport grischuna e danovamain è ella daventada in event da gala.

## Impurtant saja da far sport

President da la Federaziun grischuna per sport è il deputà da Panaduz Remo Cavegn. En ses pled da bainvegna ha el ditg che la notg da sport saja la vitrina actuala dal sport grischun. Cavegn è er sa mus-

sà ventiraivel che danovamain haja ina societad illustra suandà l'invitaziun e vegnida a la notg da sport 2016. Martin Jäger, il cusseglier guvernativ e minister da sport, ha fatg attent a l'impurtanza dal sport, il sport che saja la punt tar las scolas, las uniuns e tar la cuminanza. Il chantun haja er mess a disposiziun 700 000 francs per la promoziun dal sport ed in summa impurtant saja ch'i vegnia fatg sport, saja quai en la halla da gimnastica ubain sin la pista, ha ditg Jäger.

## Binia Feltscher la gronda favorita

Sin proposta da las diversas federaziuns da sport aveva l'uniun tetgala nominà tschintg atletas ed in atlet che vegnan dumonda per il titel sportist grischun 2016. Per la tscherna da quel quintan 50% da las vuschs entras il voting electronic dal public ed ils auters 50% entras la giuria. Il freeskiunz Andri Ragetli era l'unic sportist ch'era nominà dasper las tschintg sportistas Livia, Altmann, hockey, Binia Feltscher, curling, Sina Candrian, snowboard, Flurina Marti, unihockey e lura Svenja Stoffel, nudar. La tensiun era davairas gronda durant l'entira saira e tar la maioritad dals preschents era Binia Feltscher, ella che ha gudagnà tut quai ch'è pussaivel en sia disciplina curling, la sportista che merita il pli fitg quel titel d'onur. Per uschenumnads insiders era Andri Ragetli, l'actual victur da la

cuppa generala tar il freeski, tuttina il sportist cun la pli gronda simpatia.

## Blers han be stgassà la testa

Andri Ragetli è stà fitg surstà da sia tscherna sco sportist grischun da l'onn 2016. L'atlet da 17 onns ha ditg ch'el na haja betg quintà da vegnir tar quel titel cun esser cun Binia Feltscher nominada ina «gronda» sportista, ella che avess segir merità da daventar sportista da l'onn. Da quella opiniun eran bunamain tuts preschents e suenter che la curlinghista è «be» vegnida vicesportista grischuna da l'onn 2016 han blers be stgassà il chau. Segir fiss stà pli gist da surdar ad Andri Ragetli il titel da «newcomer», el che avess segir anc gi blers onns temp da daventar sportist grischun da l'onn cun pir avair cumenzà sia segir gronda carriera. Tenor regla na sa el betg pli vegnir ina segunda giada sportist grischun da l'onn. Il terz plaz ha retschet Livia Altmann dad Arosa, ella che ha fin oz fatg ina carriera exemplarica en il hockey e quai sin champ naziunal ed inetnaziunal. Talina Gantenbein da Scuol, l'atleta da skicross, è daventada «newcomer» da quest onn e la meglra sportista cun in impediment è Madlaina Gaudenz da Favugn. Undrà è er vegni Ursin Fravi da Lantsch per ses grond engaschament a favur dal biatlon e l'Uniun da gimnastica Tenna è il team da l'onn 2016 en noss chantun.



Da la partida a la saira da gala è er stà Alois Vinzens (a san.), il director da la Banca chantunala e gi plaschair da sia preschientscha ha Remo Cavegn, il president da la Federaziun grischuna per sport.



In pau desillisiunads suenter la saira: Binia e Reto Feltscher.



La sportista giuvna da l'onn 2016 Talina Gantenbein.



Golf e ballape unids tar la Notg da sport grischuna: Sepp Caduff, Leo Cathomas, Simon Lutz e Beat Dermont (da san.).



Laudatio e gratulaziun per la sportista da l'onn cun in impediment: cusseglier guvernativ Martin Jäger, Claudia Züllig che ha tegnì la laudatio e Madlaina Gaudenz, la polisportista undrada (da san.).



Onur per Ursin Fravi, el che viva per il biatlon.